



四溟山人全集卷之三

東郡

謝

榛

著

東郡

蘇

漢

全校

赤城

陳養才

東郡新安

張季彦程北相

全閱詳校

七言古體九十二首

徐儀賓世鳴彤管紀賢題贈長歌

宮花玉葉麗且鮮廣庭日煖橫瑞煙琴瑟能調正聲

協雙鸞對舞何翩翩翠簾繡閣春相連有女窈窕侍

瓊筵山桃結子鍾仙氣紅芳萎落回風前朱絃變調

入悽慘漳水嗚咽流濺濺郡君含悽心更懸明珠掌
中殊可憐朝親盥櫛出棗栗眼看長大垂髻年恨不
仰摘星辰助文字青雲悠悠上在天苞鳳祥麟俱世
網徐卿國琛得永傳擬標彤管閨中賢自古佳人幾
愁絕不妬蛾眉漢宮月

寄贈張中丞肖甫

家住銅梁巴蜀間風塵不倦老容顏海內勝遊無定
轍滿囊行紀漢河山山青水碧秋更好建業東連閩
門道龍虎高城駐夕陽麋鹿荒臺沒秋草共誰弔古
曠懷抱夾岸丹楓零落早未滿商家傳說心春來細

雨澤枯槁槁木開花造物功三農完稅歌年豐猶恐
生歲暮窮繁霜兩地憂思同感時草際亂鳴蟲不
信試看江上月老夫極目送征鴻又起蕭蕭西北風

野父雜感

結廬不臨車馬道交游須待商山老泉衝澗石聲自
清霜染江楓色更好暗響泠泠長滿耳一朝野望爭
於掃馴雀下皆相對閒鈎簾獨坐披素抱兒借佛書
越松嶺歸來短衣沾雪冷老禪爲說梅初花紙窓幽
寂橫瘦影杖藜不到諸天遙卧聽清鐘徹几境

寄潛運王中丞新甫兼贈張家宰子文

昔年我醉王郎宅風雨驟來暮雲黑騷雅夜談窮上
乘文星遠照蒼梧國豈期垂老見全才造物無形窺
不得中丞旄鉞鎮淮南督餉懸心瞻斗極廐馬長嘶
征戰威海鯨暗縮神明力吳楚稻田完租稅千艘安
流通薊北 聖君當宁恐歲侵朔塞屯兵應足食若
遇錢塘新冢宰細論國計非疇昔公曾總督漕運浙西人物
謀畧同內外應期補袞職下憑地勝燕河山上有天
扶漢社稷鄴臺遠寄芻蕘篇共惜衰頽一舊識候鴈
獨棲淮水側莫令俠少射飛翼春聲嘹唳過衡漳好
向柴荆報消息

送熊吉士茂初謫淮陰運判

漢宮有女妬蛾眉毒草無根空有枝鸞鳳文彩不同
振獨變鴟鴞翻自悲海棗不實偶相謔巨濤無風起
溝壑南中土俗古來厚始信荀卿言性惡巴西美人
殊不驕自題紈素幾商颯漢書猶著班姬德門掩孤
燈坐永宵已辨秋毫皂與白惟恐淮陰滯遷客魚軒
一轉蠶叢路從此加食解顏色平羗江畔舊桑梓家
庭日高鵲聲喜梅梢踈藥早含春北堂稱觴遊宦子
疊石爲山終是低蜀峯萬仞與天齊星宿可捫登絕
頂公翰造就青雲梯卽今求賢 聖意切陽和有迹

自冰雪百年祿養倚金闈官舍松邀上林月

勉嫡孫堪并述旅懷

堪也志存當奮激書聲吾伊夜未息玉在荆山終閉
光金藏麗水不見色深採窮搜勞者得千磨百鍊更
須力虎豹有文何太猛鳳凰振彩自全德要思古人
誰可式汝親垂老並無恙我憐結髮已扶杖盛年移
家今白頭雙親早逝重悽愴舊好別來盡凋喪海燕
歸巢四十春因憶敝廬衛水上故壠草沒遙悵望老
懷說與吾孫知野橋自遣沽村釀鄴西蒼然擁疊嶂
長嘯煙嵐獨相向

送徐逸人歸天台山

遊子悲秋夢故里馬頭一掉北風起浩波霜下伏蛟
龍絕嶺林深藏虎兕中原聞說有狂才駕舫高歌呼
酒杯氣橫峭壁雲根動力截奔濤地脉開白首浪爲
豈幽事欲行不行尚留意海騰日色晴堪遊天漏雨
聲暗有忌徐幹仍孫見爾曹我當千載繼風騷三臺
基廢漳流合七子神遊海月高東南形勝慕幾載吳
越山靈久相待我賦寄將題建標敢期終古倍霞彩

蟻穴嘆

人間誰是無營者吉日築基起大廈玄駒避雨會天

機一時畢命萬杵下別有疊土成山丘何幸全生穴
曠野莊生見道在此蟲亦知行藏賢哲風槐陰俯視
走銜粒鰲戴蓬萊巨細同至微至寂晴色中莫掃落
葉囑奚童因嗟世事坐將夕門掩城鴉啼月黑

冰玉篇贈郭茂才惟明兼呈李通政仲西

流風來自漢李郭含筆腐毫見奇作鄴都才思七子
通蜀嶺神功五丁鑿鳳毛日中倍文彩梧桐開花映
紫閣仙舟往事入美談史傳齊名壯京洛少年騰踏
老踈懶青雲漸高白雲落瑣闈銀臺無復夢間園扶
杖調舞鶴俯拾松子香可食駐顏豈待服丹藥丈人

峯頭仙氣長乘龍幾爲捧霞觴樂廣如水清更潔
玠如玉潤逾光功著應期周鼎鼐道存莫擬晉冠裳
試瞻北極在咫尺志懸斗室天茫茫數言片紙達門
墻野夫多病寧相忘

山中隱者

晚風吹雲覆四野有人晦迹蘿巖下百年杖屨祗荒
徑萬里河山一草舍御寇至言順造物不知力命非
達者何必空名束此身比鄰酒熟杯堪把蟻群列陣
眼前兵世事浮塵隙外馬煙火隔林古蘭若石罅迸
泉散地脉飛流倒向山厨瀉諸天在心半偈寫白蓮

正花香滿池陶潛又醉遠公社月轉松西坐深夜曉
來俗客忽敲門啄苔馴雀上屋瓦

漁樵嘆

東嶺上頭多樹木猛虎藏威白晝伏西潭水深魚鱉
多下有長蛟絕網羅漁郎樵夫各生計相逢共嗟太
平世兩毒所恃期永年山根地軸暗相連背魯腰斧
偶聚散回首茅茨炊煙斷妻子菜色饑尚可戶口辦
錢愁殺我問天不言空蒼茫四郊落葉正風霜

守拙吟因客談及蟪蛄蜘蛛之巧賦此

世人得意笑軼軻多營寡營無不可一時爭巧鳥與

蟲百年守拙誰知我盡裏疑通五嶽雲夢中恍駕三
湘舸少有四方志老誠垂堂坐君不見池面生漚石
迸火汨羅葬身首陽餓古今萬事成浩嘆風雨西來
木葉墮夜寒擁衾茅屋破日出群動人高卧力疾正
披老莊書鄰翁扣門送藥裹

蒼頡造字有感

造字起蒼頡無復結繩政鳥迹一悟在俯察是非之
源萬世定山中鬼哭亦不幸史書列傳失董狐松枝
凋枯柳條勁典午輒繼當塗高有人別議歸天命銅
雀銅駝煙草暝獲麟絕筆殊可悲至今猶賴仲尼聖

真兮僞兮吾不知落日支筇立苔徑

窮居吟寄胡秀才希顏

白頭自守攻周易家住蕩陰煙樹隔寒蛩在壁夜何
悲窮鬼連牀暗有益心含寸天無蔽雲平生不羨送
窮文眼中宦達幾凋謝壠樹啼烏空落暝

示元寶禪師

短榻翻經坐朝暮門前一轉西方路月滿人間各自
心天虛潭底誰能悟四十年來靜掩扉東林遙聽夜
鐘微漸看禪子易衰老松杪白雲何處歸

擬少陵憶昔行望王屋天壇二山作

秦嶺路迷愁無那京夜踈林老夫坐蹇驢齧草入正
飢野翁敲石取新火須臾炊黍摘秋果小有洞天曳
杖過仙境踟躕豈敢唾山靈預知待客星虎穴應教
黑霧鎖欲躡玄蹤不易到峭壁攀蘿壯襟抱軒皇架
龍無還期精華長耀金光草少陵題後獨嘯傲歷攬
瓌竒恣所好憶昔道傍賢主人一飯至今尚思報別
來音問若爲通三十幾度梨葉紅嗟彼枯骨蒿萊中
夢着已忘舊顏面遙寄此情東北風

望臨清故里感懷

故里民居夾軒蓋五十年來幾度改當時兒曹今老

大垂髻舊識我獨在人間醉眼莫見真倏忽春光不
相待東西兩河歸一流岸擁蒹葭秋復秋憶昔揚帆
坐舒嘯海門北轉是燕州

喬木頌贈別郭隆夫暨迺姪惟顯春試

鳳文麟德明時出延攬英豪網羅密佳氣低連太液
雲祥光高映長安日當朝二阮非晉俗不談玄虛重
儒術九重四散御爐煙對策彤庭揮巨筆更羨兩疏
真偉才補袞齊心匡漢室喬木根深地脉滋上叅碧
空千萬枝廣陰覆城去炎暑動搖時復清風吹老龍
潛海倦霖雨天教群種待昌期古來史傳寧無私野

夫作頌久相知短褐衝寒送別處玉堂應憶衡漳湄

形問影

我自無中生爾自有中出日間相隨動千里燈下相
依靜一室貧賤自安爾何憂禍福自當爾不愁百年
世事各勞逸忽覩鏡中齊白頭我養心神爾不悟我
還造化爾俱休問答入微乃見道陶潛異代神同遊
彼此相忘但沉醉卧榻焉知有天地

擬王維寄崇梵僧

崇梵僧慧燈夜相對世人酣睡鐘磬外法雲無迹心
可會眼中一髮須彌界崇梵僧談禪好待歲寒約坐

到梅梢月將落

茹蔓菁述感

衰老加餐何所愛，命兒斲來諸葛菜。寸心長清萬里天，五胡腥膻濁世界。東走大河分兩京，西顧太行橫一帶。中原至今增感慨，惟有詩人瘦骨在。

書客吳海歸撫州爲迺翁索題四山長歌

聞說鄱陽湖，洪波蕩流萬億頃。白雲秋色入混茫，欸乃縱橫幾漁艇。洞穴浮光照終夕，神龍抱珠睡不醒。中央突兀擁蒼翠，別有天地一仙境。兩峯復兩峯，倒插虛塘太古影。下通坤軸深莫測，山根欲動石頭吟。

鶴嫌魚腥非真味，獨食元氣巢其頂。老翁自由脫世網，不檢丹書心愈靜。時序長存松桂盟，煙霞偏助桑榆景。安得良工寫出水墨圖，遠隔吳楚見形勝。高掛壁間曠我目，毫端能盡澤國迥。要探竒絕須主人，昨夢登攀杖藜並。遊子寄聲江雪寒，北風吹帆送歸省。

梳白髮有感

一日梳頭幾絲落，經旬何止千莖脫。四海奔濤神遠驅，萬峯拔秀力平奪。少陵垂老苦吟詩，况我八十將來衰朽期。庭前又看生春草，搔首斜陽獨立時。

浩歌篇

人間歲月機頭梭無藥可青雙鬢皤兩病垂死加食
飯眼中新墓栽松蘿銘旌往往少年子焉知商山萬
古鬱差莪一丘半壑世堪避短草踈花春漸多諸孫
隨我步晴景白雲片影落滄波隔岸相呼鴨與鵝聊
供笑樂復如何

武陵蔣明府子培過鄴因談桃源之勝南都

楊茂才伯海曾繪斯圖併長歌見寄勉成一

篇用答兩意云耳

武陵賢宰多愛民若使逋逃猶避秦城頭常懸歲時
雨洞口不隔天地春君探竒蹤問漁父雞犬日間似

太古一澗如空石作橋千家相接蓬爲戶輟棹問津
沉水西厚俗非關晉風土沙丘半路沒祖龍阿房那
聽咸陽鐘荆南斜日莽迢遞目窮候鴈徒支筇我欲
勝遊繫懷抱昨宵夢着巴陵道誰能寫出桃源圖仙
花長紅春長好含毫構思通神明漢江鬢鬢東流聲
寄我半幅見兩絕兼之大篇殊縱橫斗室豁然入浩
渺坐間波動煙霞生蔣王雲仍豈凡骨一脉來自建
康城揚子相知念衰老建安回首中原情

蝴蝶嘆

醉來萬事無不擲醒後多思那有益月當中天光漸

其人逢盛時病相迫君不見花間蝴蝶草間飛清霜
滿園何處歸

閩中兵憲徐子與黔南學憲吳明卿自都下
相別歷二十年矣孟春癸卯夜予夢二君話
舊既寤仍夢同渡漳河弔古因思社友存歿
相半悲哉

文章構患屈平始鳳凰不來桐樹死老夫浩嘆誰見
心眼中兩人隔萬里一宵連夢片月知漳浦共吟銅
雀妓吳歌楚調悠揚起左手把袂右拍肩恍看形容
皆妙年勿閱丹經拘悟性句法自神骨自仙地開靈

脉通九淵龍珠並出破暝煙含光可重精華全舊交
星散踈消息人間是非在廣識名家多自轆軻成其
柰江流不向北寄興芙蓉各秋色空采幽芳坐將夕
當代風雲渺南極大海平鋪閩越天亂山橫斷羅施
國建安遺跡那相憶官邸飛夢吾莫測

梨木有感

花開滿園當盛春女兒笑摘亦何頻荒年里胥催租
稅倉卒難辨堪愁人經夜萌心動斧鑿花木無言各
有神桃樹半枯鬼物嗔梨樹一伐文人親匠氏雕刻
燦文字海嶽廣傳自書肆美玉雜之玳瑁間誰爲正

宗立赤幟東周竹帛堆如山始皇誤聽李斯議儀鳳
減色非國瑞吾道至今猶喪氣

匡使君淑教入觀歸天雄賦此寄懷

山林歌頌承平年將相策同安九邊漢家王氣北控
燕衣冠趨走正朝天禁鐘響徹明星懸上苑花開有
後先聯鑣誰和帝京篇候吏遠迎呼渡船雙旌高
出滹沱煙馬頭春雨萬家田君才不數晉呂虔寶刀
自佩龍精全回瞻斗極心悠然東海無涯收百川

老懷詠

誰出塵寰獨高蹈能鍊丹砂駐容貌百病侵人一命

微髮短齒踈不易到欲尋三老同嘯傲商山采芝成
四皓梁園相士果如神道我狂吟超八旬却訝荀卿
昔非相許負望氣見何真杖藜隨處任吾身煙霞長
醉旗亭春

夢少司馬總制劉子和賦此歌行寄上

燕山形勢帝王州野夫北望生邊愁密雲城上風
倒起密雲城下河翻流昔破烏丸萬骨朽曹瞞自恃
孫吳謀戰場色慘漢時月軍門氣壓胡天秋今代全
才能鎮靜豪俠那復談封侯青草平連古北口材官
但逞射鵰手單于歸心未偃兵龍荒獨持掃塵帚旌

旄內轉始解顏應待鏡歌報捷後夜來念切夢何人
皓月餘光照踈牖

送別陳學憲玉叔之成都

沔陽日高刺桐樹文旌飛出荆門路錦城形勝不復
具已見左思蜀都賦揚馬至今猶無數賸取摘毫攻
章句更選全才專世務光動文昌映武庫地湧橫流
豎砥柱將相埋名門下聚當代風雲漢雨露知君具
眼能預識無事探竒藻思闊浣花溪頭弔古迹少陵
舊寓非疇昔棟宇一新耀丹碧憂時慘澹髮全白唐
室宗廟雜荆棘日月雙懸照社稷千載孤忠耿無隔
石古人吟眺餘物色山靈永護垂無極

瞻拜神交在咫尺儒冠指點說更悉好磨巔崖一片
晚坐槐庭同王明府師古各賦短歌以志幽興

繁陰坐久日將夕孤鳥飛來此棲息雨滋苔徑交蒼
痕月出槐庭破暝色一官寧辭百事勞琴彈白雪調
彌高更期聯榻澄心夜天外松風萬壑濤

山海歌寄贈王節推用司

天開形勝英物聚山海高深信托寓蚌珠半吐月爲
尊鳳彩全輝霞是主上依梧桐枝下映珊瑚樹揚州

法曹何仲言祗解觀梅覓詩句兩間俯仰共晴陰萬物生成自今古誰知側枕獨夜心不盡清風入庭戶

江南李秀才過敝廬因言及詩法賦此長歌

用答來意

草堂細雨茶煙遲遠來客子愛吟詩一朝變化悟是主悟到無形偏有爲天設織機奪衆巧扶桑繭繅五色絲金莖甘露浮清氣半空吸徹了仙味但爽詞人藜藿腸漢家仙基竟入魏太白少陵兩詩豪探竒不盡登臨費暗谷頓使魑魅藏陰崖寧無神明衛苦心須求格調工寄興莫與凡流同峨眉峯頭弄片月羊

腸路口追長風平順却難險巖易含毫垂首沉思中聖代無媒自蕭散杖掛百錢步可緩出門遊眺欲忘歸天際好山青不斷

秋閨

阿歡出門行路長孤鳥易沒天茫茫隣人別家幾消息半年京口與沅湘君不見芙蓉花開照秋水顏色盛衰空自傷江湖廬舍各脩阻懸知有夢非故鄉物性參差復何訝馴雀記憶魚相忘燈下縫衣欲早寄剪刀一磨利且光好托便風吹到郎好托便風吹到郎

誦孫中丞山甫全集賦得長歌寄贈時鎮

黔南詞人吾舊識吟成不下千金璧調如白雪郢中
才響如倚樓吹鐵笛力如夸娥移二山神如驟雨走
霹靂勢如崑崙周萬里氣如戰勝開邊鄙老如錢鏐
三代仙古如夏鼎出地底麗如叢桃蒸曉霞清如片
月蘸秋水竒如俠士慨談兵深如滄海沒長鯨高如
鴻鵠碧空盡遠如葱嶺細煙橫君家流風自孫綽賦
就天台擲地聲憶昔瑣闥夜直向北斗先朝諫草不
復有旌旄過鄴訪衡門應記垂楊夾巷口磨崖獨步
太和巔托彼山靈護悠久

寄贈祝使君質夫長安行

住宅因人多秀麗廣陵三控三吳勢淮流入海使君
心楚甸帶山農父計綠上娑羅樹葉春李邕碑石獨
嶙峋書聲靜夜連諸巷機響寒天共四隣今日訟庭
閒鳥雀群僚分理萬家樂晚來月出太行巔照見永
霜清滿郭

賦得江南山水紀勝歌並壽毛友梅封君

君不見吳山高起千萬丈上有煙嵐變化出竒狀影
照江流湖水地鏡分下抱太空各垂文光密星象曉
日波平如熨橫素羅幽鳥低飛閒來往岸蘆石樹小

徑斜隔嶺樵歌應漁唱山根湖脉下相通福基壽域
深且廣武林主人偏嗜黃精澹可食子孫皆換仙骨
格望雲何由並稱觴時復馳神到鄉國元氣混沌含
孝胚聖人獨知立茲德堂中高掛二仙圖木公金母
若舊識兩顏不衰百歲期際天海色蒼茫浩無極

長江之水歌送匡使君淑教謫大梁

君不見長江滔滔發源來自西坎德至清且潔徹底
無濁泥浩蕩遠使星河動蒼茫不教日月迷夏禹爲
䟽鑿力與神功齊探勝詎言彭蠡澤遇仙寧說武陵
溪千轉乎赤楓之岸萬折乎黃蘆之埧地非關百餘

里波倒翻如許長朝橫蜃樓氣夜閃驪珠光若開闢
無灣子路易盡止莽流徒泱泱又不見漢代車生一
日九遷恐造物忌之而有妨吾不知使君理郡何如
也父老欲挽不留遙相將放逐時人意誰復此心忘
歷觀史傳賢愚善惡生性也其柰蜉蝣撼綠楊枝葉
榮悴在風霜我亦徬徨彼亦徬徨夾道班馬連嘶駐
夕陽古來宦達有行藏好駕輕帆無恙赴大梁訪信
陵可話壯圖遮莫寶劔閉匣含星芒

秋夜雨中述感呈王殿元允仁時寓普照禪
院兼示無瑕上人

禪窓夜雨不成寐側枕微吟聊自慰老僧破竹編疎
籬滋養菊花開也未葫蘆架底亂寒聲薜荔牆間浮
濕氣安得九霄出月光北照帝城分象魏豪門秉
燭各絲簧醉殺五侯并七貴明朝老僕畏衝泥却省
探囊沽酒費欲過西林問寂寥煮茶不盡澹中味

寒夜有感

向夕零霜下松院老鶴歸巢亦太晚月照人間夢不
同鐘鳴枕上心何遠補天欲比天更高填海長教海
無變好將島嶼分界石卽改萬邦爲郡縣力求分外
滿意難天竟不言無不見我居冷落春自來東風吹
冰破池面下簾何物可相親梅樹有花歲將晏

思歸引

有家歸去來旅顏何摧頽胡爲戎馬際滯此燕昭臺
十日九寄書不慰妻子懷秋風忽動思故園山妻搗
衣兒候門缺月半天霜滿地悄然孤館銷人魂不見
嵩高之山青嵯峨上有松柏下有河松柏可餐河可
釣老來幽事嗟無多離亂至今我獨苦夢中歸路迷
煙蘿龐公舊隱須一訪白雲慘澹終如何

賦得萬山形勝歌贈胡明府子仁

萬山形勝新安高據開城闔江連三百六十灘頭多

綠蘋移根拔秀歸何人獨收兩間元氣津梧桐正花
雨露春鳳凰振翼文彩新海霞綺麗耀侵晨影落巨
波翻龍鱗片霞可握文可擅左能萬化右千變大將
縱橫誰不見老成已識古人面豈學傍門色求茜美
人自是金閨彥壯圖不凡且京縣北瞻斗極倚樓遍
聞說蒲城古迹仲由堂滿地月浮寒光如素練

客居天雄九日無菊兼述雜感以遣老懷云

野花半黃亦可愛獨繞幽芳蝴蝶在城中籬落不見
花寂寞重陽無復採菊開一枝勝滿園園丁能種養
深根晉代孤高陶靖節悠然把翫倒清樽人生愜意

難預料歡歌能得幾朝昏身世自安萬事足莫羨千
花擁金谷庫中厚蓄火焰騰可憐無主歸奴僕誰兼
全福恐憂患自古連環有時斷綺羅成灰少女差寶
玉化土貧家嘆我逢九日興何違却憶春花轉眼飛
出門獨拄青藜杖天送雲霞護客衣

示張秀才仲友大名

城南張茂才飄然遠塵事每趨道院從我遊往來十
里問奇字一字墨流翻黑河片言欲長鄧林多守窮
有味數卷在縱目風光間嘯歌野田薄收了租稅濁
醪遣懷棲薜蘿薜葉再青春正煖渺渺綠平雕馬波

宋家已非慨故國豪門厚蓄何處覓爾居寂寞且待
時金穴有神騰夜色

贈王別駕仲諧金陵浩歌篇

建業世居風俗古盛年將好誰相與石頭城影落晴
波揚子江聲喧暮雨豪貴笙歌虛歲華卽今禮樂幾
名家日藹低浮杜蘅色春深半吐梧桐花鳳凰臺上
青天近文物好談吳與晉北瞻形勝 帝王州王氣
茫茫殊不盡

讀周諫議用馨詩集漫賦長歌行

安陸城西漁船夾岸燈明滅晚集楓林郢人巴人半

優劣解珮亭前水尚流仙娥不見風景別欲訪還丹
妙術學延年入悟何當問老禪宛如箭射崑崙直透
出聲落星宿海波蕩九天槌碎須彌爲平地下閨混
沌別創萬國分山川寓言誰超莊列上古來多少大
宗匠太遠莫令失歸宿至玄更得高氣象氣象非凡
人所瞻澹然細味水晶鹽梅稍夜掛西樓月沉瀟常
食不下簾隔簾冰雪清神思陽春自歌寫胸次深宵
忽散珠玉光爲收詩草開篋笥楚客調同和者多旋
沾 帝城臘酒寧辭醉紫微下與瑣闥隣 聖代應
知不負人人間風雨隔朝列海中日月容波臣漢江

東逝自不盡蛟龍作伴待時振倒翻鐵網拔出珊瑚
根叢根赤色長含潤了此上乘何處談華嶽峯頭共
坐煙嵐千萬仞

賦得山水圖長歌贈潘太守瑞徵

華嶽上逼層霄可窺星斗之真迹黃河來自西極長
送崑崙之正脉綺霞彩虹燦一色楓林豈讓柿葉赤
光映石巖好登陟眼中勝景誰盡得薄暮翠嵐藏秀
月又黑姑射僊子夜遊信能識天與元精豁胸臆後
園獨種蟠桃核僊果熟時未敢食欲獻 聖皇咀味
躋壽域汾水朝宗流不息尚方龍劍到手除荆棘更

刻長安路平通萬國直臣共佐唐虞德漁樵各生計
官吏不虛職澶州正對燕京北欲命良工寫此圖高
掛不出乎半間之壁主人坐賞最珍惜神遊中宵乘
彼蒼涼片月白

柳川園亭宴集同孔老賦

郭北林園開洞府王孫又是青山主一杯雲影座中
天半壁泉聲厨内雨掬水清心猶易醒竹陰聊爾話
丹經西河自有名家賦龍在深潭見地靈

寓居東園蘭軒主人索詩賦此以應

邇來城市厭紛擾借居名園得幽討有妾厨下事晨

炊門外蒼苔閒自掃煙火恐妨松竹清清氣宜詩起
常早脩林赤霞映虛窓不異圖中小蓬島鑿池栽藕
生紅蕖疊石成山發瑤草吾聞此地昔荒涼始知勝
景由人造王孫布置亦經綸醉客飛揚倍詞藻百花
欄內秋轉芳昨宵風雨爲花惱深沉曲折人忽迷茲
可還丹隱仙老前起高樓後築臺徙倚披雲天浩浩
太行一髮望中橫放浪乾坤此懷抱共憐滿院叢桂
香應憶淮南著鴻寶坐來且檢種樹書地闔板長樹
更好待君夜話濁醪杯月白空庭再傾倒

蜀中行贈李仲白

蠶叢之國千山阻漂泊西南爾何苦客子畏人澆俗
間孔融不見誰爲主出門感慨非中原黃葉幾彫烏
柏樹玉壘悲歌萬里雲錦江卧病三秋雨久罹患難
何所營物色蕭條有環堵九口流離半死生兒女遺
骸寄茲土夢繞高都身未歸淚灑春風啼杜宇十年
亡命聊定居當道其如有豺虎浮雲忽散青天回靈
劍方彈紫氣吐去時三峽逐驚濤直犯蛟龍蕩雙櫓
歸時棧閣下知難秦塞桑村聞社鼓田園第宅屬他
人衰白相憐獨隣父上書北闕心事明莫戀西山舊
茅戶話盡艱虞殊慘然樽前促膝更千古古來豪貴

何足論名臣屈指對君數

雪中聞西巖西池二君遊東林禪院賦此寄
意

凍雲黯澹低關塞客路迷茫阻行邁水兼冰雪作銀
河天散瓊瑤換金界誰知幻境此時同笑指乾坤問
遠公更約蓮臺坐晴夜一輪皎月正當空

歲杪行上德平鎮康安慶三王

陶潛昔日居柴桑諸兒嬉戲時相將吾生多累何感
傷况復離合殊無常燭兒長成亦自強解念衰頹來
異鄉敝裘風雪能禁當心事未了向平忙其如旅館

惟空囊空囊出暴懸斜陽欲收元氣通詩腸山林胡
爲忌老狂倏忽雲起天迷茫似恐奪秀歸東方憑高
舉手酹一觴千峯萬壑幽思長豈獨杖藜經太行更
搜五嶽成文章奚奴竊笑立我傍謂予晚節比松篁
却與片時間商量窮冬幾促典衣裳只須擁衾不下
牀梅花春信隔宮牆終朝岑寂對冰霜汝曹好爲掃
中堂垂簾兀坐焚名香神遊四海同春光春光顏色
不淒涼于今好客多淮王

逐兔篇因潘國主賜程單二生十兔走筆賦
此

少年慣是驅馳者寒天逐兔青山下饑鷹忽縱越高
林走狗如飛盡平楚須臾快意非壯圖俯身那惜千
金馬連朝顏色豈常歡往往收功見多寡筋頭一變
亦太勞更與何人薦玉笋原來難易當在心慨然犒
士君惠深

春雪柬左溪子

王孫每招重詞賦坐對山川秋欲暮鴉背斜陽醉後
天馬頭涼雨歸時路我去三關一寄情今春又客太
原城積雪滿庭人不到卧看說死憶更生

蒲州百姓歌

爲張肖甫作

五馬從東來云是銅梁彥下車德政天有知膏雨及
時潤郊甸我公之心堅於石石在水中清自見不欲
父老稱穉恐黎民怨兒童爭出門含笑識公面何當
加祿齊三公百年守蒲長春風

登太原城樓送李郡丞叔東移任平陽

會晤何遲別太早白首相違感衰草郭南咫尺望飛
旌况復青山之外紅塵道渡汾水向平陽一官兩佐
郡突見君才長兵散潢池盡赤子能使人家悲又喜
是非定矣多薦書蕭艾何曾混蘭芷河東城上垂楊
秋河東城下滄波流父老歡迎那更愁仍是去年李

霍州從今姑射洞前或有夢心清得與仙人遊

孟廉憲因談岷州邊事遂贈雪山行

雪山高插西極天上有積雪經千年望中晶晶何凜
然清徹君心日夜懸晝肅幕府明戈鋌論兵識在破
敵先自能戰守見才全岷山城外絕烽煙黃榆幾落
秋風前健兒牧馬坡上眠斜陽下嶺飛烏鳶賴是君
侯按龍泉三軍瘡痍殊可憐胡笳淒斷秦山川朔雲
低拂漢旌旃安得長纓繫左賢片石誰將功業鑄君
昔鎮靜務屯田運籌六載威名傳洮河歲暮結冰堅
天上遙賦黃竹篇中興此際同周宣君談往事對廣

筵恍疑突出雪山顛逼人寒色渺居延且進一杯重
留連節鉞豈待春營遷焉知不復臨西邊

苦雨歌送皇甫別駕子循之開州兼寄晁太

史君石

野田不雨經三春雨當五月何太頻山川蕭颯訝秋
早鴻鵠翅濕不能伸層陰北擁黃龍塞憤氣南連白
馬津泥深大道停車輪 郊野青草愁殺人况君謫
宦久淪落離亭留賦殊傷神把看寶刀氣色動此行
憂國華髮新更憶當年決瓠子武帝有歌垂漢史薊
北旣今災異多試問太史將如何

送楊玉伯歸涇陽

鳳凰城南楊柳絲當春嬾嬾牽別離古人折贈意偶
爾至今千里傳相思風吹柳花正西去黃鸝喚春春
不住落日關河悵遠人青絲白馬歸三秦壯年不嘆
功名薄獨將寶劍淹風塵有時大笑對樽酒七雄能
戰不能守燕昭之策非遠圖空使黃金高北斗君才
落落誰見知且向滄浪隨釣叟秋來水上煙雲重慎
勿濯足驚魚龍

題陳中貴園亭

去秋亭館曾招客幾處張筵到深夕花竹學成金谷

園池塘倒插錦川石昨經春雪復來遊古木間雲淡
若秋尚憶歌童唱新調醉來拍手見風流

雨雪曲酬戴錦衣伯常見贈

窮冬雨雪白浩浩薊門萬木驚春早橫笛誰吹出塞
聲梅花亂落關山道海雲不散寒悠悠客懷無那空
倚樓有人忽贈陽春曲坐吟祛我羈旅愁風流云是
楚望子家在郢中四千里三十年來錦作衣天顏咫尺
多清輝金闕門中鳴珮入玉河堤上搖鞭歸歸來
對酒興不盡月明更奏飛龍引

賦得胡無人送李侍御化甫巡邊

絕漠黃雲浩莽層冰大雪幾千丈一夜壓倒燕然
山白日不照北海上海色欲凍慘不流鯨鯢僵卧天
吳愁胡風獵獵吹不休千山埋部落萬山失馬牛安
得壯士彎弧射旄頭 君王一怒靜邊塵使者乘驄
當北巡行看勲業上麒麟倚長劍胡無人

中秋寄南都馮戶部汝言去歲此夕會汝言
潞陽時警虜變感舊賦此

小樓獨坐悲秋光美人阻絕天一方叢桂花開欲同
醉其如南北成參商燕塞干戈朔氣動秣陵風雨江
濤長憶昔中秋潞水陽相逢月下傾壺觴金波可愛

不可掬清宵死在冰雪堂倚樹高歌起烏鵲星河欲
落天蒼茫離亭向曉初分手歛見胡塵犯街柳驛路
時時問捷書都城夜夜聽刁斗朝廷有意訪賢才將
士于今嚴戰守募兵千里屯京師日散黃金無盡期
海內誅求信不易艱難早晚君王知謝安高卧欲何
補馮唐老來應自悲宦遊旅食兩不見莽莽風煙各
京甸昨聞寶劍賜嫖姚五都俠兒爭習戰上林鷓鴣
秋一鳴北極浮雲日千變三吳凋敝若爲看何當疏
奏明光殿

冬夜徐子與宅同梁公實宗子相食黃精作

薊門古木摧寒聲海月未高庭雪明主人掩戶自幽
寂客來盤薦多黃精昨日盈筐走道侶囂塵難得山
中情春苗滿山被甘雨正色獨從靈土生斲來一烹
倏變化咀之入玄筋骨輕我亦狂歌避世者何當辭
家從向平名山大澤無不有手把長鑱行復行龍蛇
深藏雪沒徑時有白雲相送迎青天茫茫發孤嘯悠
然直與元化并海鶴傳書約三子共躡九霞遊赤城

朱樓曲二首

朱樓峩峩江之浦中有美人弄機杼引領望之路修
阻鷓鴣鳴兮凋芳杜我有所懷未敢語吁嗟歸來重

延佇

朱樓峩峩江之干中有美人織素紉引領望之路險
艱鷓鴣鳴兮凋芳蓀我有所懷未敢言吁嗟歸來重
沈瀾

走筆效太白歌行寄上瀋王殿下

少遊燕趙間亦有燕趙氣大德不易酬俯仰在天地
天地無言覆載我兩鬢全白齒半墮匣中寶劍蓄龍
精四海歷遊無不可時逢厚俗且爲家寧羨淮南叢
桂花人生知遇非偶爾枚馬聚散殊堪嗟君不見太
行天設中原春巔崖直上幾千尺願作峯頭一片雲

飛向宮城朝復夕西風若肯徐徐吹風雲長會無盡期

送鍾進士季烈使太原便道還豫章

二月馬嘶關塞遠使旌西度羊腸坂黃金賞士功何遲丹闕請纓計未晚太行峯頭春雪殘晉陽城上落霞寒勞歌更向章江去芳杜青青誰共看

再寄沈叅政敬叔

一騎飛去南陽城亂山不斷雲縱橫奔流觸石聚風雨七十二灣河水聲水聲清徹何人耳隱侯樓上正徙倚邇來宦遊梁楚間豐年侵歲關憂喜問君草疏

當時心儼對神明瓊闥裏回瞻北極紫微垣落月鳴鐘宿鴉起欹枕遐思誰復同四海蒼生不寐中洛城有客自神會古今勝事歸豪雄不見諸葛舊廬沒秋草誰卧煙霞空自老

鄭藩王夫人哀歌行兼慰國主暨崇德王

宮花五月霜風發帝子傷心痛到骨久寄淮西同苦辛纔歸河內各存歿淑德付彤管名與山河長淑魂遊碧霄神隨夜月光鳳觜煎膠竒自見復接斷絃無痕聲有變一彈不免調悽慘再彈使人太悲感誰能縮地登十洲返魂香草殊難求香草可得魂可返沁

水倒波翻西流君不見明月山前多宰木有子攀枝
不勝哭去時嬰兒今弱冠幾日相看入鬼錄朝也悲
哀暮也悲哀二泉嗚咽聲縈迴中有千年長夜臺淚
滴不復生蒿萊父兮母兮且相慰孝德兩全共天地
寄贈朱長水孝子詩
終天有恨殊難解浩蕩白雲落滄海織機遽斷絲尚
存丸藥曾餘苦猶在淒其風雨下江城夜夜啼烏孝
子情石笋灘西萬竿竹傷心凍笋爲誰生

傷劉羽泉總制

頻年楚越徵兵路能使秋陽破海霧旌鉞威中眷萬

家歌謔聲裏霜千樹 當朝將才多壯圖或戰或守
清江湖吳地干將氣猶盛接天愁色滿新都

傷張白灘給事短歌

中興並用豫章才誰竟完名殊可哀不到首陽徒受
餓欲收河套遽成災 天子聖明世莫測紫微光動
移三台青瑣留難幾諫草美人不見月空好悵望吳
淞鶴自悲丘園霜下松楸老

王侍御斯進見過客居談及周兵憲子才兼
憶梁廉憲乾吉慨然有賦

朝來柱史論當代話到故人成感慨垂老殊憐謝客

流知音共羨周郎輩秦中桑梓近邊烽應擬勳名勒
景鐘螻蟻穴山大何損蛟龍躍海浩能容有才自古
誰無妬憶昔文昌今武庫寒星劔動鬱汾波旭日旗
翻岢嵐樹千譽一毀道何窮君惜同年兩不同更訝
瑣闥曾謫宦五噫非復舊梁鴻

吳方伯子有復會代州因入覲行迫不及追
送遂登城樓遠眺賦此寄懷

夏屋之山雲悠悠遙逐旆旌殊不休滹沱之水東北
流逝波一派牽離愁歲暮王程何太迫衣白山人無
去留清晨駐馬獨臨眺鴉啼初日翻城頭晉陽別後

冒雨雪非關劔術馳邊州君步廟廊我岩壑古來韋
布直交游帝里春水開御溝東風擬待濟川舟萬國
朝天集軒冕寧知久客頻登樓

送吳山人子充遊雲中

春寒攬貂裘蹀躞驅紫騮問君去何許云是塞門遊
丈夫安肯棲故丘北向龍沙天盡頭蘇武城邊積雪
滿李陵臺上孤雲愁二子杳然不可見神交千古心
悠悠眼前陳迹增感慨彈鋏悲歌回素秋燕然之山
忽改色金河之水翻倒流風吹大荒落日慘胡鴈驚
飛不復留此時踟躕多隱憂百年意氣懷朋儔獨自

流知音共羨周郎輩秦中桑梓近邊烽應擬勳名勒
景鐘螻蟻穴山大何損蛟龍躍海浩能容有才自古
誰無妬憶昔文昌今武庫寒星劔動鬱汾波旭日旗
翻岢嵐樹千譽一毀道何窮君惜同年兩不同更訝
瑣闥曾謫宦五噫非復舊梁鴻

吳方伯子有復會代州因入覲行迫不及追
送遂登城樓遠眺賦此寄懷

夏屋之山雲悠悠遙逐旆旌殊不休滹沱之水東北
流逝波一派牽離愁歲暮王程何太迫衣白山人無
去留清晨駐馬獨臨眺鴉啼初日翻城頭晉陽別後

冒雨雪非關劔術馳邊州君陟廟廊我岩壑古來韋
布直交游帝里春水開御溝東風擬待濟川舟萬國
朝天集軒冕寧知久客頻登樓

送吳山人子充遊雲中

春寒攬貂裘蹀躞驅紫騮問君去何許云是塞門遊
丈夫安肯棲故丘北向龍沙天盡頭蘇武城邊積雪
滿李陵臺上孤雲愁二子杳然不可見神交千古心
悠悠眼前陳迹增感慨彈鋏悲歌回素秋燕然之山
忽改色金河之水翻倒流風吹大荒落日慘胡鴈驚
飛不復留此時踟躕多隱憂百年意氣懷朋儔獨自

磨崖題賦罷還來共醉長安樓

西園春暮

西北風來何太劇落花滿園春可惜黃鸝叫春蝴蝶
愁四野無人日將夕惟有一枝留晚春當砌徘徊不
忍摘且將樽酒對殘花春去悲歌復何益

暮雨送春

花盛春將歸豈待百花飛有人獨先見感嘆當斜暉
霍家豪貴從頭數金谷繁華無定主客邊杯酒且酣
歌向夕閉門風又雨

登城歌

古之賢哲兮擇交游世無滌兮膠莫投彼何人兮非
俗流大德在心兮不可酬直言數兮生釁尤枳棘當
路兮我孔憂登高樓兮望九州孰爲友生兮嗟未休

雨雹有感呈宋大叅

客窓午睡晚來起簾外明明一庭水云是雨工碎却
陰山水雷電相驅寒色裏擊瓦驟破群雀驚迸階倒
回衆兒喜癡兒不解老夫憂指點門前說未休蒼生
所望在禾黍更欲餽餉供邊頭于今宋玉夜無寐豈
待落水方悲秋

客居篇呈孔丈

客居寥落天積陰其柰二毛愁復侵東籬有花白衣
至菊花恨不栽成林糟牀雨聲夜徹耳醅甕春色時
關心昨夢長江變綠酒茫茫不知幾許深倒吞明月
蕩豪興下有蛟龍那敢吟屈原李白莫相笑肯與爾
輩俱浮沉醒者醉者懷不同我狂獨在醒醉中百年
形骸匪金石詎可一日無春風燕臺梁園舊遊處好
客邇來惟孔融太行山頭共俯仰人間誰識真英雄
幾醉良宵感秋別大火自西人自東

秋風歌呈孔方伯汝錫

孔天胤字汝錫號文谷

對秋風感懷不與故鄉同來自西極動萬里焉得吹

我太行東孤城木葉正搖落金河蕭颯催征鴻客居
汾陽久不返天涯惆悵飛枯蓬古來道氣出浮俗主
人高誼今英雄昔逢春雨百花發涼露又垂蘭桂叢
小窓起坐不盥櫛荒庭洒掃呼兒童老無閒日求詩
工苦中生死一蓼虫兵厨多酒且復醉嗣宗何必悲
途窮野夫憂樂各有謂莫嗔狂態成衰翁昨夜登臺
獨舒嘯秋聲不斷關山空

瞻遠樓爲宋大叅伯鎮賦

古姚州郭西別業開林丘花石夾階小玄圃極天形
勝當高樓况復三台之峯最秀拔嵐光直向空中浮

畫棟雕甍耀日月倒瀉丹碧澄溪流窓含滄海越東
雨簷接明河天上秋啼鳥一聲重悲慨淒風忽起薰
葭洲君不見混茫萬古魚龍國下通地軸深叵測倏
蕩煙霞曠望間四時元氣浩無極衆鳥波翻幾點青
日初隱見扶桑色陰晴變幻入揮毫不到冥搜未易
得神會動千里豈獨窮目力逝水與孝思悠悠兩不
息更堪歲晚對冰霜主人懷抱復誰識

晚登洛陽城西望靈寶寄懷許太守令夫

薄暮高城獨延佇望中飛鳥沒煙樹峴山何異楚天
雲盤澗更連秦甸雨二十年來春草長兒童牧馬向

斜陽廣州人覩磨崖賦北指中原說大方

寄金廣文

漢廷誰復憐才子謫去長沙幾千里三楚寒雲過鴈
聲九疑秋色搖江水騷人自古悲秋風黃陵廟前斑
竹叢惆悵湘靈杳何處試聽瑤瑟月明中

寄謝車國醫元吉

西來苦詩思力疾自河汾訪爾園亭共幽事踈籬擁
菊當斜曛能爲膏盲驅二豎更談命脉經宵分天應
不忌徐陳輩使我得遇長桑君擬渡三江弄明月漫
遊五嶽披高雲山川留得放歌叟杖頭百錢且沽酒

有藥可扶垂老身，檢方已見回生手。相逢兩幸無重
輕，詩與爾名同不朽。奚童驅馬一函書，人在高都幾
翹首。所懷况值冰雪晨，去年傾盖知予真。黃鳥鳴時
好乘興，遙認門前楊柳新。恐君采藥山中去，悵望桃
花各自春。

雪中偶過李鴻臚東明宅留酌因懷盧太史

濬卿劉少叅才甫王侍御子梁張戶曹聚甫

前雪未消今雪來，寒侵宮殿朝不開。昆池凍合石鯨
卧，玉笛喚春催落梅。白日遠迷涿鹿野，黃雲低暗軒
轅臺。鐵甲如水戰士苦，城頭饑烏啼正哀。北風吹人

僵欲死，驅馬不動空徘徊。道傍官舍何幽寂，我亦山
陰乘興客。入門自拂謝莊衣，開樽爲我破寒色。中懷
傾倒醉不辭，春燈吐花向深夕。同鄉朋舊各天涯，綠
鬢憂時誰易白。宦情客計成睽違，海鴈江魚斷消息。
重來清夜益相思，月明偏照燕京陌。

送劉兵憲叔清歸覃懷

旌旗飛出黃塵隔，父老攀轅留不得。林中啼鳥尚含
情，天際浮雲亦改色。歸種稻田閒賦詩，寧忘南陌送
君時。聖朝何限山公啓，誰似君心吾不知。

馬上贈羅山甫

有客翩翩時並馬壯遊氣激風霜下胡笳聲斷盧龍
天塞草寒深涿鹿野皂鷗飛從西北來彎弓欲射空
徘徊聖代勲名莫輕取朔雲低暗黃金臺

秋夜雲峰書齋餞別賦得秋字

丈夫平生何所求百年與世同沉浮枕上一思動萬
里黃金容易齊山丘君家父子繼劉向時振藻思多
冥搜著書堆案未滿意眼前豈暇觀蜉蝣君不見五
龍山上千松稠松枯石爛名應休况今樂善存古道
日無俗擾軒庭幽晚來有客自延欸呼童出典青綺
裘高燭結花照几席西風吹動湘簾鈎共談世務復

文字賓主相看俱白頭笑我吟詩胡不飲清時獨抱
三閭愁詎知醉客輕王侯劍歌豪氣不能收豪氣混
茫隘江海彎弓欲向扶桑遊巨濤歛騰在跬步翻空
不定風颼颼萬蜂銜珠奪明月鰲魚背上信宿留仙
侶相將踏紫霧繞窮三島仍十洲肯學書生拘細論
寓言聊爾從莊周人生大小各有志豈徒衰老工雕
鏤龍蛇已藏地窟夜鷹隼爭擊天關秋君還閉扉我
行路揚鞭西北指并州故人相逢說曠達空囊去住
能自由托乘山川隨處賦姑射洞開石髓流山靈爲
喜標形勝禁彼衆鳥無啁啾翠華杳然弔漢武白雲

汾水空悠悠英雄不遇生太晚何時且遂田園謀漳
河之源自發鳩因憶鄴中走馬經長楸徐陳零落罷
歡宴不聞廣殿彈箏篴驚心兩墮并梧葉嗟哉太行
何阻脩上黨有待幾朋儔黃花正開酒新筓定約登
高醉重九滿天秋色當西樓

四溟山人全集卷之三終

